


Giringiyên Zanistî yên Anfalan



Dr. Ebdulbaqî Mayî

Roja 24-î sibata 2007-ê dadgeha navneteweyî ya Lahay, li welatê Holanda, kuştina xelkê Bosniya bi destên leşkerê dewleta Yugoslaviya kevin, di destpêkên 1990-î de, bi qirkirinê hukim kir. Lê çinku çi belge û dukoment yên nivîsî li ser fermanên rijêma Yugoslavî, ji bo vê qirkirinê bi dest dadgehê nekeftibûn, êdî dadgeh neşîya rijêma Yugoslavî gunehbar bike, lê ew Genoside wek guneha efsêr û karbidestên şerker yên Sirbî hesab kirin.

Her wê rojê, kenalên satelaytên biyanî û xweyanî, bi rasterast dadgeha 5 xizmetkarên rijêma Seddam Husenî li ser kiryarên Anfalan belav kirin. Kurdekê xelkê gundê "Ocmet Al-Akrad" wek şahid ji bo ku di dadgehê de, berevaniyê ji gunehkarekê bike, hatibû gazîkirin. Kurdê me bi cil û bergên xwe yên kurdî û bi ezmanekê erebî yê rewan, medh û sena vî gunehkarî dikir. Kurdê me yê şahid, nimûne li ser nimûneyê li ser zîrekî, wefadarî û çakiyên vî gunehkarî dianîn. Ev gunehkare di wextê Anfalan de, sekreterê Komîteya Karûbarên Bakûr bû, ya ku serperîştî û bi rêvebirina Anfalan dikir.

Van her du dadgehên di heman rojê de, di medya cihanî de belav bûyîn, pirsyarek di serê min de çêkir: Gelo bo çi kuştina xelkê Bosnî bi destên Sirbiyên Yugoslavî li dadgehek navneteweyî hate hukimkirin û wek Genoside hate hisabkirin, belê karesateka wek Anfalan ya mezin û ji alê neteweyî ve stratejîk, di dadgeheka Îraqî de, hate xendiqandin û kete di koşa hindek mirovên bêhewl û şîyan de, heta ku li dûmahîkê kurd bi xwe, berevaniyê ji gunehkaran bikin, wek kurdê me yê xelkê "Ocmet Al-Akrad"? Heger Enfal ketiba bersînga dadgeha navneteweyî ya Lahay tu bibêji gumanek da bo dadgehê çêbe li ser guneha rijêma Seddamî ku fermanên Anfalan rakirin?

Gelek nivîs û dukoment li ser karyayên Anfalan li serhildana 1991-ê bi dest me kurdan ketibûn. Gelo ew hemû belge û dukoment çi lê hatin? Bo çi ew niho dijî rijêma Seddamî di dadgeheka navneteweyî de, nahêne bikarînan? Heger ew hemû dukomentên nivîsî li ser biryarên fermî yên rijêma Seddamî têra gunehbarkirina vê rijêmê di dadgehek navneteweyî de nekin, bila lêkolînên zanistî yên li ser Anfalan bikevin kar. Bisporên kurd û yên biyanî jî, babetên zanistî li ser Anfalan belav kirine. Çawan ew lêkolîn li dadgeha dijî bazirganê Holendî yê ku çekê kîmyayî firotî Seddam Husenî hatin bikarînan, hêşta çêtir ew dişên ji bo dadgeha dijî Seddamî jî, bihêne bi karînan.

Her wesa xelkê kurd yên ku ji Anfalan rizgar bûyîn bi hezaran di Kurdistanê de hene û li derveyî welatî jî, wek dendikên hinarê li cihanê yên vepeqijîn û belav bûyîn. Paxilên wan ji serhatî û bîrhatinên naxweş yên Anfalan pir in. Herçî gava berpîrsên me kurdan xwe li wan rizgarbûyên Anfalan bikin xwedan û bispor û şehreza yên babetên derûnî, komelnasî û yasayî lê haydin, ew dê belgehên zanistî û akadîmî yên bêguman ji bo dadgeha dijî rijêma Seddamî peyda bikin. Vî xelkî, ne tenê dastanên lê qewimînên Anfalan wek evro li bîrên wan in, belkî ew dikarin bibin mamosta û şehrezayên bihagiran, ji bo dersgotin û peydakirina nimûneyên giring ji bo wan lêkolîn û zanistan.

Biyaniyan berî xweyaniyan dest bi lêkolînan li ser Anfalan kirin û karyarên Anfalan bi Genoside li qelem dan. Dukomentên pêşî li ser guneh û zordariyên Anfalan bi destên biyaniyan hatin nivîsîn û belav bûn. Ew di demekî de diqewimî, wextê ku bisporên me kurdan xwe dikuşt û disot ku derfetekê bibînin da xwe li dîrok û mafên xelkê xwe bikin xwedan. Neko bisporên kurd di van babetan de, nebûn yan jî sist û xav bûn, belê wan kes li pişt xwe nedît ku harîkarî û piştgiriya wan bikin. Gelo heger bisporên kurd derfetên xwe dîtiban tu bibêji da niho meseleka hinda mezin ya wek Anfalan hema wesa bi sanahî bikeve ber dadgeheka nizim ya neteweyî, li şûna biçe bersînga dadgeha Lahay?

Niho jî hêşta derfeta karkirinek zanistî û akadîmî li ber me kurdan maye. Meteleka Swêdî dibêje "Direng ji çine çêtir e". Şûna paşguhixistin û pûtepênêkirinê piştgîrî û harîkarî ji serokatiya Kurdistanê bo bispor û zanayên kurd pêtivî ye, ji ber ku bi duristî xizmeta xwe bo xelkê xwe pêşkeş bikin. Çi guman tê de nîne, heger dadgehên navneteweyî seha belgehên zanistî li ser Anfalan bikin, ew dê bi sanahî qirkirina Anfalan wek Genoside dijî rijêma Seddamî biçespinin.

Ez bawer dikim ku xwe rukumandin li ser daxwaza rastiye û ji bo bikarînan Anfalan, bi rengê zanistî û akadîmî bo avakirina binyatên stratejî yên neteweyî, bisporên kurdan zehf in û amade ne. Ew dê li ser daxwazên rizgarbûyên Anfalan her piştgîr bin û binyatên destgehên zanistî û akadîmî li ser Anfalan ji bo paşerojê danin. Rojek dê bihêt gunehbarên Anfalan, dê li dadgehên navneteweyî bihên mehkûmkirin û Enfal wek Ginoside dê bihêt nivîsîn, da mafên xelkê me winda nebin.